

DECEBALVS REX DACIAE.



**D**Ecebalus rex Dacorū suo tempore Romanis erat formidabilis. fuit enim in cognoscendis rebus bellicis perspicax, in agēdo solers, ad inuadendum hostem promptus, & ad regrediendū (si ita res postularet) celerrimus. Nouerat etiā optimè insidias struere, praelium committere, uictoria uti, & acceptam cladem moderatè ferre. Cum itaq; talis esset, Traianus Imperator ipsos Dacos cum reliquis Germanis ad foedus pellexit. Verū Decebalus Romanorum calliditatem intelligēs, qui foedera tantūm ad suam utilitatem inirent & soluerent, author Germanis fuit, ut foedere rupto suā libertatē strenuè tuerent, presertim cū Romani bello Parthico occupati essent. Propterea omnes suo exēplo animare cupiens, arma comparat, transfugas recipit, arces instaurat, atq; finitimas nationes ad defectionem incitat, anno post Christum natum centesimo primo. Id cum Romæ nunciatum esset, Decebalus à Senatu hostis iudicatur. quoniam uerò aliquoties iam Romani Germanorum fortitudinē experti erant, statuit Traianus Imperator per se, & non per alios copiarum duces id bellum conficere. Itaq; quā maximo potuit exercitu ad Danubiū ripam profectus est.